

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
OPĆINSKI SUD U SARAJEVU
Broj: 65 0 St 1102802 24 St
Sarajevo, 10.04.2025. godine

Općinski sud u Sarajevu, stečajni sudija Sedina Duraković, u stečajnom postupku nad imovinom stečajnog dužnika VANTA d.o.o., sa sjedištem na adresi Trg Međunarodnog prijateljstva 15/4, Sarajevo, zastupan po punomoćniku AD Haračić + Partners d.o.o. Sarajevo, van ročišta dana 10.04.2025. godine, donio je slijedeće:

R J E Š E N J E

OTVARA SE stečajni postupak nad imovinom stečajnog dužnika VANTA d.o.o., sa sjedištem na adresi Trg Međunarodnog prijateljstva 15/4, Sarajevo.

Za stečajnog upravnika se imenuje stečajni upravnik Amra Somun Dolarević iz Sarajeva.

Određuje se upis zabilježbe o otvaranju stečajnog postupka u sudskom registru Općinskog suda u Sarajevu u matičnom registarskom broju subjekta upisa 1-20090.

Zbog nedostatka stečajne mase za pokriće troškova stečajnog postupka, ovaj stečajni postupak se neće provoditi, te se isti i ZAKLJUČUJE.

Nakon pravosnažnosti ovog rješenja isto će se dostaviti Odjeljenju registra privrednih subjekata Općinskog suda u Sarajevu, radi brisanja stečajnog dužnika iz sudskog registra MBS 1-20090.

Troškovi stečajnog postupka padaju na teret stečajnog dužnika.

Ovo Rješenje će se objaviti u "Službenim novinama FBiH", na oglasnoj tabli suda, web stranici suda-elektronskoj tabli suda i na internet stranici FIA-e.

O b r a z l o ž e n j e

Rješenjem ovoga suda broj gornji od 04.11.2024. godine pokrenut je postupak radi utvrđivanja uslova za otvaranje stečajnog postupka nad imovinom privrednog društva VANTA d.o.o., sa sjedištem na adresi Trg Međunarodnog prijateljstva 15/4, Sarajevo, te je za privremenog stečajnog upravnika imenovana Amra Somun Dolarević iz Sarajeva, ul. Gabrielle Moreno Locateli 23. Navedeno rješenje je objavljeno u Službenim novinama F BiH broj 94/2024 od 27.11.2024. godine i izvršeno javno oglašavanje putem oglasne table suda.

U postupku privremeni stečajni upravnik je dana 10.12.2024.godine dostavio Izvještaj u kojem je, pored ostalog, naveo da postoje zakonski razlozi za otvaranje stečajnog postupka nad privrednim društvom VANTA d.o.o., sa sjedištem na adresi Trg Međunarodnog prijateljstva 15/4, Sarajevo, ali da dužnik nema imovine koja bi činila stečajnu masu, a što je ponovio i na ročištu za ispitivanje uslova za otvaranje stečajnog postupka dana 08.01.2025. godine.

Cijeneći Izvještaj privremenog stečajnog upravnika, Javnim pozivom od 09.01.2025. godine pozvani su povjerioci i zainteresovana lica da u roku od 30 (trideset) dana od dana objavljivanja ovog poziva predlože otvaranje stečajnog postupka nad imovinom stečajnog dužnika VANTA d.o.o., sa sjedištem

na adresi Trg Međunarodnog prijateljstva 15/4, Sarajevo, uz uplatu predujma za obezbjeđenje troškova stečajnog postupka u iznosu od 3.000,00 KM na depozitni račun ovog suda broj 1411965320009639 otvoren kod BBI Banke, da ukoliko u ostavljenom roku niko od pozvanih ne predloži otvaranje stečajnog postupka i ne uplati određeni predujam, sud će donijeti Rješenje o otvaranju i zaključenju stečajnog postupka, te da ako zainteresovana lica predlože otvaranje stečajnog postupka i uplate određeni predujam u navedenom roku, sud će otvoriti stečajni postupak i voditi ga u skladu sa odredbama Zakona o stečaju.

Isti je objavljen u Službenim novinama F BiH broj 06/2025 od 29.01.2025. godine i izvršeno javno oglašavanje putem oglasne table suda i web stranice suda-elektronske table suda.

U ostavljenom roku a ni do dana donošenja ovog Rješenja nije dostavljen dokaz o uplati navedenog iznosa, niti je dostavljen podnesak kojim je neko od povjerilaca ili zainteresovanih lica obavjestio sud da će uplatiti traženi iznos predujma.

Odredbom člana 115. Zakona o stečaju je propisano da stečajni povjerioci mogu svoja potraživanja prema stečajnom dužniku ostvarivati samo u stečajnom postupku.

Na osnovu Izvještaja privremenog stečajnog upravnika utvrđeno je da stečajni dužnik duži vremenski period nije imao poslovnih aktivnosti, da su računi blokirani, da stečajni dužnik nije bio u stanju izmirivati svoje obaveze po osnovu poreza i doprinosa te da nema imovine iz čije bi se prodaje mogli pokriti troškovi stečajnog postupka tj. nema stečajne mase.

Po Javnom pozivu od 09.01.2024. godine niko od pozvanih/zainteresovanih lica nije predložio otvaranje stečajnog postupka niti dostavio dokaz o uplati traženog predujma za pokriće troškova stečajnog postupka, pa obzirom da nema stečajne mase za pokriće troškova stečajnog postupka, niti je iskazana volja za predlaganje otvaranja stečajnog postupka a time ni predujmljivanje sredstava za pokriće troškova postupka, to sud nije ni provodio stečajni postupak tj. otvorio je isti, odredio upis zabiljezbe rješenja o otvaranju i stečajni postupak odmah i zaključio shodno odredbi člana 102. stav 8. Zakona o stečaju, a nakon pravosnažnosti istog i brisanje stečajnog dužnika iz sudskog registra.

Kako je jedna od posljedica otvaranja stečajnog postupka i imenovanje stečajnog upravnika, te imajući u vidu da je postoji obaveza sačinjavanja i predaje finansijskih izvještaja Finansijsko-informatičkoj agenciji, u slučaju otvaranja i zaključenja stečajnog postupka, a shodno članu 36. stav 6. Zakona o računovodstvu i reviziji FBiH, i da je stečajni upravnik dužan poduzeti i druge poslove, to je sud imenovao stečajnog upravnika, koji je dužan izvršiti navedene obaveze.

Odluka o objavljivanju otvaranja i zaključenja stečajnog postupka donesena je na osnovu odredbi člana 102. stav 8. i 107. Zakona o stečaju.

Odluka o brisanju pravnog lica iz sudskog registra donesena je na osnovu odredbi člana 108. stav 1. tačka b). Zakona o stečaju.

STEČAJNI SUDIJA
Sedina Duraković

Pouka o pravnom lijeku:

Protiv ovog rješenja dozvoljena je žalba. Žalba se podnosi Kantonalnom sudu u Sarajevu putem ovog suda u 3 (tri) primjerka, u roku od 8 dana po proteku 5 dana od objave rješenja u „Službenim novinama FBiH“.